

- भारतीय वायुसेना रो एक जंगी जहाज चूरु मांय पड़्यो— हादसा मांय दो जणा री मौत ।
- प्रधानमंत्री नरेन्द्र मोदी पांच देशां रा दौरा रा आखिरी चरण मांय नामीबिया पूर्या— भारत अर नामीबिया बीचे न्यारा-न्यारा हलकां ऊं जुड़्या केई करार माथे सही ।
- केन्द्रीय सहकारिता मंत्री अमित शाह कह्यो—राजस्थान अर गुजरात रा ऊंट पालकां रा भला सारु मिल र काम करण री योजना ।
- मुख्यमंत्री भजनलाल शर्मा गुरु पूर्णिमा री पैली वाळी सांझ आज डीग मांय राख्या जा रह्या न्यारा-न्यारा कार्यक्रम मांय शिरकत कर रह्या है ।

000

चूरु जिला रा राजलदेसर हलका मांय आज भारतीय वायुसेना रो एक लड़ाकू जहाज पड़ ग्यो । चूरु रा एस.पी. जय यादव आकाशवाणी समाचार सागे बातचीत रे दौरान बतायो के हादसा री ठोड़ ऊं दो बळ्योड़ी लाशां अर मोटा हलका मांय जहाज रो मलबो मिल्यो है । वे बतायो के ई हादसा रे कारण वठे रा किण ई रेहवासी री जान ने नुकसाण नी व्ह्यो है । हादसा री फेंट मांय आयो भारतीय वायुसेना रो जगुआर लड़ाकू जहाज सूरतगढ़ वायुसेना टेशन ऊं उड़्यो हो । हादसा रा कारणां री ठा करण सारु वायुसेना कोर्ट ऑफ इन्क्वायरी बणायी है । म्हाणा चूरु खबरनवीस बतायो के जहाज रे पड़तां ई वां मांय लाय लाग गयी अर वां रा टुकड़ा एक खेत मांय बिखर गया ।

राज्यपाल हरिभाऊ बागडे अर मुख्यमंत्री भजनलाल शर्मा हादसा माथे दुःख जतायो है । मुख्यमंत्री सोशल मीडिया रे ज़रिए कह्यो के हादसा रे तुरत पाछे प्रशासन हरकत मांय आ ग्यो । वे कह्यो के अहलकारां ने राहत अर बचाव रा काम करण रा हुकम दिया ज्या है । श्री शर्मा ई हादसा रे कारण मरण वाळां रा पिरवार वाळां रे प्रति दुःख जतायो है ।

हनुमानगढ़ जिला मांय नगराना गांव कने आज रेत ऊं भर्या ट्रक ने पिछाड़ी ऊं रोडवेज बस टक्कर मार दीनी । हादसा रे कारण चार जणां री मौत व्हे गयी, जदके 17 जणा जख्मी व्हे गया । तीन मुसाफिर मौके ई दम तोड़ दीनो । म्हाणी खबरनवीस बतायो के जख्मी लोगां री हालत नाजुक बण्योड़ी है ।

गुजरात रा बड़ोदरा मांय आज संवारे पादरा कने गंभीरा पुल रो एक हिस्सो ढस जावण रे कारण नौ जणा री मौत व्हे गयी अर केई लोग जख्मी व्हे गया । प्रधानमंत्री ई हादसा रे कारण व्ही मौतां माथे गहरो दुःख जताता थकां जख्मी लोगां रे बेगा ई ठीक व्हेवण री कामना कीनी है । मरण वाळां रा पिरवार वाळां ने प्रधानमंत्री राष्ट्रीय राहत कोष ऊं दो-दो लाख रुपया अर जख्मी लोगां ने 50-50 हजार रुपया री मदद देवण रो ऐलाण करी ज्यो है ।

प्रधानमंत्री नरेन्द्र मोदी अर नामीबिया रा राष्ट्रपति नेटुम्बो नंदी-नदैतवा बीचे नामीबिया री राजधानी विंडहोक मांय बातचीत व्ही । ई दौरान खास हलकां मांय मदद रा नुवा मौकां री तलाश कर र दोन्यू देशां बीचे माली भागीदारी

मजबूत करण माथे जोर दियो ज्यो। ई दौरान दोन्यू देशां बीचे ऊर्जा, सुरक्षा, स्वास्थ्य सेवा, जैव ईंधन अर बुनियादी ढांचा ऊं जुड़्या हलकां मांय मदद बधावण रा करार माथे ई सही करीजी। प्रधानमंत्री मोदी नामीबिया रा संस्थापक अर पहला राष्ट्रपति डॉ. सैम नुजोमा ने श्रद्धांजलि अर्पित कीनी। श्री मोदी ने नामीबिया रा सब ऊं ऊंचा नागरिक सम्मान ऊं नवाजा जावेला। वां रो नामीबिया री संसद ने संबोधित करण रो कार्यक्रम है। श्री मोदी री अफ्रीकी देश नामीबिया रो ओ पहलो दौरा है। श्री मोदी पांच देशां री यात्रा रा आखिरी दौर मांय आज संवारे नामीबिया री राजधानी विंडहोक पूग्या।

केंद्रीय गृह अर सहकारिता मंत्री अमित शाह अंतर्राष्ट्रीय सहकारिता वर्ष रे मौके गुजरात, मध्यप्रदेश अर राजस्थान री सहकारी समितियां ऊं जुड़ी महिलावां अर दूजा कार्यकर्तावां सागे बातचीत कीनी। ई दौरान श्री शाह बतायो के गुजरात अर राजस्थान सरकार मिल र देश भर रा ऊँट राखण वाळां ऊं दूध भेळो करण अर वां रा औषधीय गुणां रे जरिये बत्तो मोल हासिल करण री योजना बणा रही है। सहकारिता मंत्री बतायो के आयुर्वेदिक दवाइयां बणावण वाळी चार कंपनियाँ ऊँटनी रो दूध बीमारियां रा ईलाज मांय काम लेवण ऊं जुड़्या गुणां री जांच कर रही है। श्री शाह कह्यो के सहकारिता मंत्री रा तौर ऊं वां ने किसाना, गरीबां अर ढांढा-ढोरां सारू काम करण रो मौको मिल्यो है।

मुख्यमंत्री भजनलाल शर्मा डीग अर भरतपुर रा दो दिन रा दौरा रा तैत आज डीग जिला मांय पृच्छरी का लोठा पूग्या। वां रो श्रीनाथ जी मिन्दर मांय पूजा-अर्चना करण अर जनता सागे बातचीत करण रो कार्यक्रम है। काल गुरू पूर्णिमा रे मौके मुख्यमंत्री रो भरतपुर रा हनुमान मिन्दर मांय व्हेवण वाळा जळसा मांय शिरकत करण रो कार्यक्रम है।

प्रदेश मांय ढांढा रा ईलाज रा 197 नुवा उपकेंद्र खोल्या जावेला। पशुपालन विभाग रा निदेशक डॉ आनंद सेजरा आ जाणकारी दीनी। वे बतायो के 28 जिलां मांय खोल्या जावण वाळा आं चिकित्सा केन्द्रां सारू और ओहदा बणावण बाबत् प्रशासनिक अर माली मंजूरी दे दीरीजी है। आं उपकेंद्रां सारू पशुधन निरीक्षक अर पशु परिचर रा 394 नुवा ओहदा माथे ई भर्ती करी जावेला।

सवाईमाधोपुर जिला मांय रणथम्भौर रा किला हलका मांय बाघ टी-120 उर्फ 'गणेश' री आवाजाही ने ध्यान राखता थकां जनता रे आवण-जावण माथे रोक लगा दीरीजी है। रणथम्भौर टाइगर रिजर्व रा रेंजर अश्वनी प्रताप सिंह आ जाणकारी दीनी। वे बतायो के लारला महीना ई किला हलका मांय टाइगर री मौजूदगी री ठा पड़ी ही, ज्यो पाछे ई महीना री सरूआत ऊं ई किला मांय लोगां री आवाजाही माथे रोक लगा दीरीजी ही, जिण ने कुछ दिन पछे खोल दियो ज्यो हो। रेंजर बतायो के बाघ रे जंगल मांय पाछो जावण पछे किला मांय जावण री मंजूरी दे दी जावेला।

भीलवाड़ा जिला मांय जहाजपुर रा इटुण्डा गांव रा सरपंच अर ई-मित्र चलावण वाळा एक जणा ने घूस लेवण रा आरोप मांय गिरफ्तार करी ज्या है। भ्रष्टाचार निरोधक ब्यूरो पंचायत रा दफ्तर मांय ई दोन्यू आरोपितां ने एक ठेकेदार ऊं 24 हजार रुपया री घूस लेता रंग्या हाथां पकड़्या। अ लोग एक ठेकेदार ऊं बिल पास करण री ऐवज मांय आ रकम लीनी ही।

प्रदेश मांय आज केई ठोडां हल्की ऊं मझला दर्जा री बिरखा रा समाचार है। चूरू अर आरे-सारे रा हलकां मांय दोपहरां पाछे रिमझिम बारिश व्ही। श्रीगंगानगर जिला मांय ई चोखी बरसात व्ही। म्हाणा खबरनवीस बतायो के लारला चौबीस घंटा मांय व्ही जोरदार बिरखा रे कारण केई ठोडां पाणी भर ग्यो।

मौसम विभाग रे मुजब लारला चौबीस घंटा मांय सब ऊ बत्तो 10 सेंटीमीटर पाणी हनुमानगढ़ मांय बरस्यो। सीकर, सिरौही, बांसवाडा अर झुंझुनू जिला मांय ई कठे-कठे मेह व्ह्यो। राज्य रा ऊगणी हलका मांय काल ऊ जदके आतूणी हलका मांय 12 जुलाई ऊं बिरखा मांय बधोतरी रा आसार है।

शिक्षा मंत्रालय री ओर ऊं काल गुजरात रा केवड़िया मांय केंद्रीय विश्वविद्यालयां रा कुलपतियां रो दो दिन रो सम्मेलन सरू करेला। केंद्रीय शिक्षा मंत्री धर्मेन्द्र प्रधान ई ई सम्मेलन मांय शिरकत करेला। ई सम्मेलन रा नतीजा

देश मांय आला दर्जा री भणार्ई—लिखाई रो भविष्य बणावण अर साल 2047 तांई विकसित भारत बणावण रा देश रा सामूहिक नजरिया ने आगे बधावण मांय खास भूमिका निभावेला।

000

केंद्रीय शिक्षा मंत्री धर्मेन्द्र प्रधान कह्यो है के देश मांय ज्ञान ने सामाजिक कल्याण ऊं जोड़ र समाज री उम्मीदां अर ऊर्जा री जरूरतां पूरी करण वाळी स्मार्ट रणनीति बणावण री जरूरत है। श्री प्रधान आज आई.आई.टी.नई दिल्ली मांय **“भविष्य के लिए तैयार ऊर्जा शिक्षा: अवसर और चुनौतियाँ”** मुद्दा माथे राख्यी ज्यी राष्ट्रीय कार्यशाला मांय बोल रह्या हा। वे कह्यो के भारत साल 2070 तांई शून्य कार्बन उत्सर्जन वाळी ऊर्जा हासिल करण ओड़ी बढ़ रह्यो है। शिक्षा मंत्री कह्यो के भारत बिजली काम लेवण वाळो दुनिया रो तीजो मोटो देश है।

000

आकाशवाणी ऊं हर महीना प्रसारित कर्यो जावण वाळो प्रधानमंत्री नरेन्द्र रो खास कार्यक्रम **मन की बात** ई दफा 27 जुलाई ने व्हेला। आ ई कार्यक्रम री 124वीं कड़ी व्हेला। ई सारु आप ई मुफ्त नम्बर **1800—11—7800** माथे 25 जुलाई तांई राय दे सको हो।